

四庫全書

集部

# 欽定四庫全書

集部

文章辨體彙選卷三百十六

詳校官中書臣竇汝翼

主事銜臣徐以坤覆勘

總校官檢討臣何思鈞

校對官中書臣葉蘭

謄錄監生臣張護

欽定四庫全書

文章辨體彙選卷三百十六

明 賀復徵 編

序三十六圖類

五嶽圖序

漢東方朔

五嶽真形者是山水象也磬曲迴轉陵阜形勢高下參差長短舒卷波流湧於奮筆鋒鈇暢乎嶺嶠雲林玄黃有如書字之狀是以天真道君下觀規矩擬縱趣向因

如字之韻隨形而名山焉昔黃帝徵師諸侯與蚩尤戰於涿鹿之野遂禽之諸侯咸宗軒轅為天子代神農是為黃帝天下有不順者從而征之破山通道未嘗寧居東至于海登泰山勒岱宗西至崆峒登鷄頭南至于江登熊湘北逮輝弼合符釜山而邑于涿鹿之野遷徙往來無有常處察四岱並有佐命之山惟南嶽孤特而無輔乃章詞三天太上道君命霍山潛山為儲君奏可帝乃自造山躬寫形像連五嶽之後又命青城為丈人署

廬山為使者形皆以次相續此適始於黃帝耳古畫五  
嶽真形首目者乃是神農前世太上八會羣方飛天之  
書法殆鳥跡之先代也自不得仙人釋注顯出終不可  
知

禹貢九州地域圖序

晉裴秀

圖書之設由來尚矣自古垂象立制而賴其用三代置  
其官使掌其職暨漢屠咸陽丞相蕭何盡收秦之圖籍  
今秘書既無古今之地圖又無蕭何所得秦圖書惟有

漢氏所畫輿地及諸雜圖各不設分率又不考正準望亦不備載名山大川其所載列雖有麤形皆不精審不可依據或稱外荒迂誕之言不合事實於義無取大晉龍興混一六合以清宇宙始於庸蜀采入其阻文皇帝乃命有司撰訪吳蜀地圖蜀土既定六軍所經地域遠近山川險易征路迂直校驗圖記罔或有差今上考禹貢山河川流原隰陂澤古之九州及今之十六州郡國縣邑疆界鄉閭及古國盟會舊名水陸徑路為地圖十

八篇今制地圖之體有六焉一曰分率所以辨廣輪之度也二曰準望所以正彼此之體也三曰道里所以定所繇之數也四曰高下五曰方邪六曰迂直此三者各因地而制形所以校夷險之異也有圖象而無分率則無以審遠近之差有分率而無準望雖得之於一隅必失之於他方有準望而無道里則施於山海絕隔之地不能以相通有道里而無高下方邪迂直之校則徑路之數必與遠近之實相違失準望之正故以此六者叅

而考之然後遠近之實定於分率彼此之實定於準望  
徑路之實定於道里度數之實定於高下方邪迂直之  
算故雖有峻山鉅海之隔絕域殊方之迴登降詭曲之  
因皆可得舉而定者準望之法既正則曲直遠近無所  
隱其形也

八駿圖序

唐李嗣

予嘗聞有周穆王八駿之說乃今獲覽厥圖雄凌趨騰  
彪虎文螭之流與今馬高絕懸異矣其名盜驪蜚黃驎



裹白羲之屬也視矯首則若排雲視舉足則若乘風有  
待馭之狀有矜羣之姿若日月之所不足至若天地之  
所不足周軒軒然疑疑然言其真也實星降之精思其  
發也猶神扶其魄軾者如仙御者如夢將變化何別哉

點戛斯朝貢圖傳序

李德裕

昔越裳貢雉薦於宗廟西旅獻獒陳以典訓所以感其  
至而戒其初也仁聖文武至神大孝皇帝御歷之四年  
天瑞燦爛王道昭焯五材並用六轡斯柔布政宣室以

張神化報兵朔野以耀威靈故得天晬而清日晏而明  
蟲螟不生嘉穀以成中寓既安四夷來庭由是龍荒君  
長黠戛斯遣使汪吾合素等上表獻良馬二匹絕大漠  
而貢赤誠涉流沙而霑赭汗非至德所感孰能臻於此  
乎皇帝以前有鸞旂焉用驥驎不貴龍友惟駕鼓車乃  
命其使見於內殿賜以珍膳錫之文錦謹按故相魏國  
公賈耽所撰古今四夷述黠戛斯者本堅昆國也貞觀  
二十一年其酋長入朝授以將軍印拜堅昆都督逮於

天寶季年朝貢不絕暨中國多難為回鶻隔礙黠戛斯  
忿其桀驁乘彼薦饑於是破龍庭焚蜀幕蕭條萬里地  
無種落始得出重泉而見白日披氛霧而覩青天臣伏  
見太宗謂羣臣曰南荒西域自遠而至其故何哉宰臣  
房玄齡對曰殊域來朝者中國乂安帝德遐被所致也  
太宗曰向中國不安亦何緣而至朕覩此懷懼何者昔  
秦始皇并吞六國漢武帝威加戎狄今殊方異類無遠  
不賓竊比秦漢想無多愧亦欲傳之子孫念二王之末

途朕所以不能不懼爾臣伏思太宗往日之懼致我唐  
百代之隆則聖祖詒謀可謂深矣此太宗所以永保鴻  
名為受命之祖陛下所以丕承王業為中興之主豈不  
宜哉天旨以賈耽有陳平鎮撫之才得充國通知之敏  
其所述作該明古今乃詔太子詹事韋宗卿秘書少監  
呂述往蒞賓館以展私覲稽合同異覲縷闕遺傳胡貊  
兜離之音載山川曲折之狀條貫周備文理洽通臣伏  
以貞觀初中書侍郎顏師古上言昔周武王天下太平

遠國歸款周史乃集其事為王會篇今萬國來朝蠻夷  
率服實可圖寫請撰為王會圖有詔從之臣輒因韋宗  
卿呂述所記異聞飾以續事敢叙率服以冠篇首

帝王世次圖序

宋歐陽修

堯舜禹湯文武此六君子者可謂顯人矣而後世猶失  
其傳者豈非以其遠也哉是故君子之學不窮遠以為  
能而闕其不知慎所傳以惑世也方孔子時周衰學廢  
先王之道不明而異端之說並起孔子患之乃修正詩

書史記以止紛亂之說而欲其傳之信也故畧其遠而  
詳其近於書斷自唐虞以來著其大事可以為世法者  
而已至於三皇五帝君臣世次皆未嘗道者以其世遠  
而慎所不知也孔子既沒異端之說復興周室亦益哀  
亂接乎戰國秦遂焚書先王之道中絕漢興久之詩書  
稍出而不完當王道中絕之際奇書異說方充斥而盛  
行其言往往反自託於孔子之徒以取信於時學者既  
不備見詩書之詳而習傳盛行之異說世無聖人以為

質而不自知其取舍真偽至有博學好奇之士務多聞  
以為勝者於是盡集諸說而論次初無所擇而惟恐遺  
之也如司馬遷之史記是矣以孔子之學上述前世止  
於堯舜著其大略而不道其前遷遠出孔子之後而乃  
上述黃帝以來又詳悉其世次其不量力而務勝宜其  
失之多也遷所作本紀出於大戴禮世本諸書今依其  
說圖而考之堯舜夏商周皆同出於黃帝堯之崩也下  
傳其四世孫舜舜之崩也復上傳其四世祖禹而舜禹

皆壽百歲稷契於高辛為子乃同父異母之兄弟今以  
其世次而下之湯與王季同世湯下傳十六世而為紂  
王季下傳一世而為文王二世而為武王是文王以十  
五世祖臣事十五世孫紂而武王以十四世祖伐十四  
世孫而代之王何其繆哉嗚呼堯舜禹湯文武之道百  
王之取法也其盛德大業見於行事而後世所欲知者  
孔子皆已論著之矣其久遠難明之事後世不必知不  
知不害為君子者孔子皆不道也夫孔子所以為聖人



者其智知所取捨皆如此

序越州鑑湖圖 曾鞏

鑑湖一曰南湖南並山北屬州城漕渠東西距江漢順  
帝永和五年會稽太守馬臻之所為也至今九百七十  
有五年矣其周三百五十有八里凡水之出於東南者  
皆委之州之東自城至於東江其北隄石撻二陰溝十  
有九通民田田之南屬漕渠北東西屬江者皆漑之州  
東六十里自東城至於東江其南隄陰溝十有四通民

田田之北抵漕渠南並山西並隄東屬江者皆溉之州  
之西三十里曰柯山斗門通民田田之東並城南並隄  
北濱漕渠西屬江者皆溉之總之溉山陰會稽兩縣十  
四鄉之田九十頃非湖能溉田九十頃而已蓋田之至  
江者盡於九十頃也其東曰曹娥斗門曰稟口斗門水  
之循南隄而東者由之以入於東江其西曰廣陵斗門  
曰新邇斗門水之循北隄而西者由之以入於西江其  
北曰朱儲斗門去湖最遠蓋因三江之上兩山之間疏

為二門而以時視田中之水小溢則縱其一大溢則盡縱之使入於三江之口所謂湖高於田丈餘田又高海丈餘水少則泄湖溉田水多則泄田中水入海故無荒廢之田水旱之歲者也由漢以來幾十載其利未嘗廢也宋興民始有盜湖為田者祥符之間二十七戶慶厯之間二戶為田四頃當是時三司轉運司猶下書切責州縣使復田為湖然自此吏益慢法而奸民寢起至於治平之間盜湖為田者凡八千餘戶為田七百餘頃而

湖廢幾盡矣其僅存者東為漕渠自州至於東城六十  
里南通若耶溪自樵風涇至於桐鳴十里皆水廣不能  
十餘丈每歲少雨田未病而湖蓋已先涸矣自此以來  
人爭為計說蔣堂則謂宜有罰以禁侵耕有賞以開告  
者杜杞則謂盜湖為田者利在縱湖水一雨則放聲以  
動州縣而斗門輒發故為之立石則水一在五雲橋水  
深八尺有五寸會稽主之一在跨湖橋水深四尺有五  
寸山陰主之而斗門之鑰使皆納於州水溢則遣官視

測而謹其閉縱又以謂宜益理隄防斗門其敢田者拔其苗責其力以復湖而重其罰猶以為未也又以謂宜加兩縣之長以提舉之名課其督察而為之殿賞吳奎則謂每歲農隙當僦人濬湖積其泥塗以為丘阜使縣主役而州與轉運使提點刑獄督攝賞罰之張次山則謂湖廢僅有存者難卒復宜益廣漕路及他便利處使可漕及注民田理置石柱以識之柱之內禁敢田者刁約則謂宜斥湖三之一與民為田而益隄使高一丈則

湖可不開而其利自復范師道施元長則謂重侵耕之  
禁猶不能使民無犯而斥湖與民則侵者孰禦又以湖  
水較之高於城中之水或三尺有六寸或二尺有六寸  
而益隄壅水使高則水之敗城郭廬舍可必也張伯玉  
則謂日役五千人濬湖使至五尺當十五歲畢至三尺  
當九歲畢然恐工起之日浮議外搖役夫內潰則雖有  
智者猶不能必其成若日役五千人益隄使高八尺當  
一歲畢其竹木費凡九十二萬有三十計越之戶二十

萬有六千賦之而復其祖其勢易足如此則利可坐收而人不煩弊陳宗言趙誠得以水勢高下難之又以謂宜從吳奎之議以歲月復湖當是時都水善其言又以謂宜遵賞罰之令其為說如此可謂博矣朝廷未嘗不聽用著刑之法故罰有自錢三百至於千又至於五萬刑有杖百至於徒二年其文可謂密矣然而田者不止而日愈多湖不加濬而日愈廢其故何哉法令不行而苟且之俗勝也昔謝靈運從宋文帝求會稽回踵湖為

田太守孟顓不聽又求休崐湖為田顓又不聽靈運至以語詆之則利於請湖為田越之風俗舊矣然南湖由漢歷吳晉以來接於唐又接於錢鏐父子之有此州其利未嘗廢者彼或以區區之地當天下或以數州為鎮或以一國自王內有供養祿廩之須外有貢輸問饋之奉非得晏然而已也故強水土之政以力本利農亦皆有數而錢鏐之法最詳至今尚多傳於人者則其利之不廢有以也近世則不然天下為一而安於承平之故



在位者重舉事而樂因循而請湖為田者其言語氣力  
往往足以動人至於修水土之利則又費財動衆從古  
所難故鄭國之役以謂足以疲秦而西門豹之治鄴渠  
人亦以為煩苦其故如此則吾知吏孰肯任難當之怨  
來易至之責以待未然之功乎故說雖博而未嘗行法  
雖密而未嘗舉田者之所以日多湖之所以日廢由是  
而已故以為法令不行而苟且之俗勝者豈非然哉夫  
千歲之湖廢興利害較然易見然自慶厯以來三十餘

年遭吏治之因循至於既廢而世猶莫寤其所以然況於事之隱微難得而考者由苟簡之故而弛壞於冥冥之中又可知其所以然乎今謂湖不必復者曰湖田之入既饒矣此遊談之士為利於侵耕者言之也夫湖未盡廢則湖下之田旱此方今之害而衆人之所覩也使湖盡廢則湖下為田亦旱矣此將來之害而衆人所未覩者故曰此游談之士為利於侵耕者言之而非實知利害者也謂湖不必濬者曰益隄壅水而已此好辯之

士為樂聞苟簡者言之也夫以地勢較之壅水使高必敗城郭此議者之所已言也以地勢較之濬湖使下然後不失其舊不失其舊然後不失其宜此議之所未言也又山陰之石則為四尺有五寸會稽之石則幾倍之壅水使高則會稽得尺山陰得半地之窪隆不並則益隄未為有補也故曰此好辯之士為樂聞苟簡者言之而又非實知利害者也二者既不可用而欲禁侵耕開告者則有賞罰之法矣欲謹水之蓄泄則有閉縱之法

矣欲痛絕敢田者則拔其苗責其力以復湖而重其罰  
又有法矣或欲任其責於州縣與運使提點刑獄或欲  
以每歲農隙濬湖或欲禁田石柱之內者又皆有法矣  
欲知濬湖之淺深用工若干為日幾何欲知增堤竹木  
之費幾何使之安出欲知濬湖之泥塗積之何所又已  
計之矣欲知工起之日或浮議外搖役夫內潰則不可  
以必其成又已論之矣誠能收衆說而考其可否用其  
可者而以在我者潤澤之令言必行法必舉則何功之

不可成何利之不可復哉。輦初蒙恩通判此州。問湖之  
廢興於人。求有能言利害之實者。及到官。然後問圖於  
兩縣。問書於州。與河渠司至於叅覈之。而圖成熟。究之  
而書具。然後利害之實明。故為論次。庶夫計議者有考  
焉。熙寧二年冬。卧龍齋。

捕魚圖序

晁補之

古畫捕魚一卷。或曰王右丞草也。紙廣不充幅。長丈許。  
水波渺瀰。洲渚隱隱。見其背岨。水葭莢向搖。落草萋然。

始黃天慘慘雲而風人物衣裘有寒意蓋盡江南初冬  
欲雪時也兩人挽舟循涯一人篙而下之三人巾帽袍  
帶而騎或馬或驢寒峙肩擁袖者前揚鞭顧後攬轡語  
袂翩然者童負囊尾馬背而倚若擁鼻者三人屈竹為  
屋三童子踞而起大網一童從旁出者縛竹跨水上一  
人立旁維舟而下有筍者方舟而下四人篙而前其舟  
坐若立者兩童子曳方罟行水間者縛竹跨水上一人  
巾而依蘆蔭坐沉大網旁筍屈竹為屋縛竹跨水上童

子跪而起大網者一人屈竹為屋前有瓶盂可見者篙者槳者俛下罩者三人皆笠方舟載大網行且漁兩兒兩蓋依蘧蔭坐有巾而顙出網中得者艇操楫一人縛竹跨水上顧而語前有杯盂者方舟載大網出網中得者縛竹跨水上兩兒沉大網旁維艤者兩人篙其舟甚力有帷幙坐而濟若婦人可見者方舟依渚一人篙一人小而顙三童子若飲食若寐前有杯盂者一人推葦間童子俛而曳循涯者人物數十許目相望不過五六

里若百里千里右丞妙於詩故畫意有餘世人但以語  
言粉墨追之不似也常憶楚人云帝子降兮河渚目渺  
渺兮愁予嫋嫋兮秋風洞庭波兮木葉下引物連類謂  
便若湖湘在目前思頃時歲晚道吳江如此漁者男子  
婦女童稚舟楫梁筍網罟冒罩紛然在江然其業庶而  
事佚故無市廛爭利意此與畫二大夫去國其色無別  
恨奚以異元和元年四月二十日李希孝出之欲摹寫  
無善工乃借韓退之序畫人物意識之潁川晁補之序



周易旁註前圖序

明朱同

愚自中年以經書授徒教子每於本文之旁著字以明其意義其有不相連屬者則益之於兩字之間苟又有不明不盡者則又益之於本行之外學者讀本文而覽旁註不見其意義之不足也惟易旁註則有前圖者易之為易其本也圖象而已文王周公孔子之書實為圖象作注脚故明此經者不得不求其本也河出圖洛出書天不愛道泄諸象數一可已二何居作河圖洛書合

一圖第一聖人之則之也八卦成列而又因而重之其傳於今也各有橫圖圓圖而六十四卦圓圖中又有方圖則亦悉矣帝出乎震成乎艮其方位之象又何為哉作先天後天合一圖第二先天後天其始其終既有序矣連山歸藏首艮首坤今不能知而周易首乾坤終既未濟經分上下其間卦序乃復如彼作周易卦序圖第三卦變也卦主也互體也卦數也卦位也納甲也之六者時雜見於經傳必各著其全使人可通攷焉可也

作六圖第四淳安夏氏有讀易十字樞愚平日竊窺於  
易得三大義二者經傳訓釋之機要也則以附六圖之  
後聖人處憂患之道自履至巽其傳古其指深卦之名  
義殆未足以盡之也作三陳九卦圖第五揲著以求卦  
因變而用爻比義從長宜勿拘一說作著卦變占圖說  
第六夫子言著卦之德曰圓曰方固非直曰七奇八偶  
而已作著七卦八圖第七邵子天根月窟之吟非為今  
易安注脚也豫章蕭氏周易卦序之學區別於三畫六

畫之原而象意昭融玩味乎正變始終之故而教道明  
著前纂為圖今錄其全文於後而係以邵子之詩履運  
處身同一揆也作三十六宮圖說第八八圖為之前而  
後周易旁註可得而讀矣朱升序

萬木圖序

楊士奇

萬木圖者右春坊右庶子兼翰林侍講建安楊榮勉仁  
昭其大父達卿先生之德示其後之人也先生有孝行  
於為善施義汲汲焉然不喜以施名以為受人之施者

恒有愧恥為辱之心而不自慊也夫施於人而使其心  
愧恥為辱而不自慊猶不施也必使受吾之施者如其  
所當得如無與於我而即乎其心之安庶幾可也元之  
季世兵戈饑饉民困窮凍餒無食至相食以苟活雖父  
子夫婦相視不能相保卹所在皆然時先生藏穀甚富  
將發廩賑之指某山號於衆曰有能相吾力樹木者乎  
樹一木予穀若干願相吾力者先予穀於是爭願出力  
來請穀既悉飯之乃如所言願樹木多寡予之穀不籍

識其姓名卒亦不視其功而所活不可勝計矣先生之樂施何其忠厚委曲而周備與居數歲木鬱然崇茂悉中於材先生指以戒其子若孫曰不自意今之盛如此也其毋苟自為利將有為學宮為釋老之宮為橋梁及津渡之舟而需材者給之有貧欲為居室歿欲為棺而不得材者給之毋苟自利也於是所施利益多矣時福建行省左丞院德柔聞而高之命工作萬木圖表之緡紳君子多為文若詩紀之詠之既皆失於兵而其子若

孫佩服訓戒至於今不違然欲其後世皆佩服不違此  
圖所以繼作也嗚呼始先生知施穀而已知求受施者  
即乎其心之安而已豈計樹之木後當何如哉而受施  
者必盡力焉不可以苟蓋天理之在人心有不能已也  
先生所存如此惜乎其僅施於衰亂艱虞之際猷畝之  
間而徒布衣以終其身也不然使遇治平之時得一命  
為所欲為所施利不其博哉如其後之人能世承其訓  
推廣是心而行之不已焉其於施利固又博也是用告

諸其來者

甲申十同年圖詩序 李東陽

甲申十同年圖一卷蓋吾同年進士之在朝者九人與  
南京來朝者一人而十會於太子太保刑部尚書吳興  
閔公朝瑛之第而圖焉者也圖分為三曹自卷首而觀  
其高顴多髯髯強半白袖手右嚮而側坐者為南京戶  
部尚書公安王公用敬微鬚髮頽白鵞肩高聳背若有  
負而坐中者為吏部左侍郎泌陽焦公孟陽微鬚多髯



白髭髭不受櫛面骨稜層起左嚮坐右手持一冊冊半  
啟閉者為禮部右侍郎掌國子祭酒事黃巖謝公鳴治  
又一曹微鬚頰面笑齒欲露左手握帶右嚮而坐者工  
部尚書柳州曾公克明虎頭方面大目豐準鬚髯微白  
而長左手攜牙牌右握帶中左坐者閔公也白鬚黎面  
面老皺兩手握帶中右坐者工部右侍郎泰和張公時  
達無鬚頰面聳肩袖手而危坐且左顧者都察院左都  
御史浮梁戴公廷珍又一曹為戶部右侍郎益都陳公

廉夫者面微長且頰有濃鬚半白稍右嚮而坐為兵部尚書華容劉公時雍者面微方而長鬚鬢皓白左手握帶右手按膝而中坐予則面微長而臞髭數莖白且盡中若有隱憂右手持一卷如授簡狀坐而嚮左居卷最後者是也十人者皆盡工面對手貌驟得其形模意態惟焦公奉使南國弗及會預留其舊所圖者而取之故僅得其半而已是日謝公倡為詩吾八人者皆和焦公歸亦和馬傳有之物之不齊物之情也十者數之成而

亦數之漸以吾十人者得之於四十年之餘良不為少  
然以二百五十人者而不能二十之一則謂之多亦不  
可也以年論之閔公年七十有四張公少二歲曾公又  
少二歲謝焦二公又少一歲劉戴陳王四公又遞少一  
歲予於同年為最少今年五十有七亦已就衰追憶曩  
時之少者壯者使猝然而逢之若不相識也且以地以  
姓論之無一同者以官則六部之與都察院其署與職  
亦莫能以皆同蓋所謂不齊者如此然據志効力各執

其事以贊揚政化則未始不同語有之人心不同有如其面今固不可以貌論也又何爵齒族里之足云乎茲九人者之才之行彙徵類聚建功業於天下固將以大有成惟予蹇劣無似方懼名實不副而是心也不敢以相負也然則今日之會豈徒為聚散離合世講之具哉唐九老之在香山宋五老之在睢陽歌詩宴會皆出於休退之後今吾十人者皆有國事吏責故其詩於和平優裕之間猶有思職勤事之意他日功成身退各歸其

鄉顧不得交倡迭和鳴太平之樂以續前朝故事則是  
詩也未必非寄情寓義之地也因粹而序之以各藏於  
其家閔公名珪張公名達曾公名鑑謝公名鐸焦公名  
芳劉公名大夏戴公名珊王公名軾陳公名清今各以  
字舉而予則太子太保戶部尚書兼謹身殿大學士長  
沙李東陽賓之也進士舉於天順之八年會則於弘治  
十六年癸亥三月二十五日越翼日乃序

萍會圖序

李夢陽

萍會圖王官十有五人紀善一教授十二典善二十  
五人者所謂東西南北之人也生不同同王官官不同  
同地也於是十五人者約曰始吾儕生東西南北也固  
不謂同王官即知有王官知同地乎夫勢無常形止無  
定踪吾儕知自是不復散而東西南北也夫萍之未水  
也知水乎水知萍乎及颶風過焉縈花絮於連漪之曲  
於是萍者布清而根深泛精以化神綽約娉娉嬉波上  
下始與水一矣故有寤寐其求而終身無邂逅之遇而

傾蓋於塗路者非素相聞也斯所謂偶然之合也夫合  
未有不散者故君子同也必聚而酒食相樂於是乎有  
會會者所以繫情防散者也有類乎萍故稱萍會焉散  
而思必及其親又子孫所世講焉世講必曰吾祖吾父  
昔與某同王官同地蓋同會云於是會不可不圖圖者  
所以示永而存義之道也李子先人亦嘗為王官茲地  
覽其圖而嘆曰嘉哉會也然亦時使之焉夫叔世寡安  
枕危邦鮮甘食設境內有綠林銅馬之警國無河間東

平之譽輔之以端而拒之不信導之以良而專恣者自  
遂也諸君方背刺以憂責荷擔以謀遷非穆生逃則張  
衡去即有繫情防散示永存義之心弗暇為心矣而奚  
會之有圖故曰寧淵無焦鱗時使之耳此之謂也

叙商城林泉圖

何景明

商城王君與予父友相別於汴水上別且二十年矣今  
歲夏自其鄉來訪道故舊間攜所繪林泉圖語予父曰  
人謂大隱弗居城市真隱弗識姓名若皆自逸於林泉



而世弗得見且弗聞也吾迹弗能謝城市而亦弗能逃  
姓名於里閭奚望於若顧於若竊慕愛之而所謂林泉  
者常往來予懷也故吾凡值林泉雖莫吾有吾得而愛  
之又從而適之已有擴吾所未見者而愛之而適之由  
是雖天下之大凡有林泉者吾無不可愛而適之者奚  
必吾有也又以遊覽有時弗可常者弗可常固有弗可  
得而愛且適者也遂為是圖凡林泉之變不窮吾圖咸  
有之一披玩而向之所謂可愛而適者咸在吾目則凡

林泉之在天下者固吾圖中物也吾方請諸大夫之詩  
各綴於圖上敢欲得公之子中書君之文焉父諾乃召  
景明語曰王君與予遊予嘗重其人蓋尚賢樂士者也  
能赴人之急者也好義而忘利者也夫人之品超遠庸  
下固焉而不可強者也氣拘於所處志執於所見其孰  
能移之王君者迹在城市而有林泉之想名在里閭而  
有隱逸之慕其言又若非世累所得係絆者則人品不  
同有不可量也吾聞之好賢樂士者昌急人之難者獲

報好義忘利者寡患君其有後矣是圖之序爾必毋辭  
所請俾觀者亦足以考志意而得其人焉景明既受命  
退曰斯皆至論又何所序乃併記其言君名賢字崇德

綵衣春燕圖序

歸有光

吳粵於三代不在五服之內春秋於吳猶夷之最後秦  
取楚吳始內屬及略取陸梁皆以為郡縣然一日有事  
杜黃浦陽山湟谿之闕即與中國隔絕及漢兵下漉離  
牂牁之水然後五嶺以南遂為天子之邦至今十有餘

歲會稽南海其文物常勝於河洛齊魯古稱冀為中州  
蓋天地之氣有所鍾即為中州則知今吳粵之盛不可  
泥古而論也余數見番禺之士往往秀穎古所謂中州  
不能通一日胥會京師嘗竊歎四方萬國之外彈冠結  
綬於朝國家威靈軼於三代矣南海鄭祖欽吳與余同  
榜進士同試吏大司空其貌冲然有德君子也自始興  
張文獻公余襄公皆嶺海之產至今朝立文莊公相繼  
屹然為名臣吾於同榜中嘗私目之庶幾有復紹前哲

而起者蓋於祖欽望之一日祖欽道其尊君養新翁居  
家樂志有書史之娛有山海之觀有荔枝洲花鄔昌華  
芳春園林之勝因慨然起萬里衡陽之感又自計明年  
當得州縣便道歸可以過家上壽也余又歎當周之盛  
時士有驅馳王事不得見其父母如陟岵之詩者矣今  
番禺去京師萬里祖欽一旦思其親可以計日而還則  
士之生於今時者又何幸也會有為祖欽繪綵衣春燕  
圖者因為序之云

文章辨體彙選卷三百十六

欽定四庫全書

文章辨體彙選卷三百十七

明 賀復徵 編

序三十七

志類

志序

梁沈約

左史記言右史記事事則春秋是也言則尚書是也至於楚書鄭志晉乘楚杙之篇皆所以昭述前史俾不泯於後司馬遷制一家之言始區別名題至乎禮義刑政

有所不盡乃於紀傳之外勅立八書片文隻字鴻纖備舉班氏因之靡違前式網羅一代條流遂廣律歷禮樂其名不變以天官為天文改封禪為郊祀易貨殖平準之稱革河渠溝洫之名綴孫卿之辭以述刑法采孟軻之書用序食貨劉向鴻範始自春秋劉歆七略儒墨異部朱贛博采風謠尤為詳洽固並因仍以為三志而禮樂疏簡所漏者多典章事數百不記一天文雖為該舉而不言天形致使三天之說渾然莫辨是故蔡邕於朔



方上書謂宜載述者也漢興接秦坑儒之後典墳殘缺  
耆生碩老常以亡逸為慮劉歆七略固之藝文蓋為此  
也河自龍門東注橫被中國每漂決所漸害重災深堤  
築之功勞役天下且闢洛高塏地少川源是故鎬鄠漆  
潏咸入禮典漳滏鄭白之饒溝渠沾溉之利皆民命所  
祖國以為天溝洫立志亦其宜也世殊事改於今可得  
而略竊以班氏律歷前事已詳自楊偉改創景初而魏  
書關志及元嘉重造新法大明博議回改自魏至宋宜

入今書班固禮樂郊祀馬彪祭祀禮儀蔡邕朝會董巴  
輿服並各立志夫禮之所苞其用非一郊祭朝饗匪云  
別事旗章服物非禮而何今總而裁之同謂禮志刑法  
食貨前說已該隨流派別附之紀傳樂經殘缺其來已  
遠班氏所述止抄舉樂記馬彪後書又不備續至於  
八音衆器並不見書雖略見世本所闕猶衆爰及雅鄭  
謳謠之節一皆屏落曾無概見郊廟樂章每隨世改雅  
聲舊典咸有遺文又案今鼓吹鐃歌雖有章曲樂人傳

習口相師祖所務者聲不先訓以義今樂府銑歌校漢  
魏舊曲曲名時同文字永異尋文求義無一可了不知  
今之銑章何代曲也今志自郊廟以下凡諸樂章非淫  
哇之辭並皆詳載天文五行自馬彪以後無復紀錄何  
書自黃初之始徐志肇義熙之元今以魏接漢式遵何  
氏然則自漢高帝五年之首冬暨宋順帝昇明二年之  
孟夏二辰六沴甲子無差聖帝哲王咸有瑞命之紀盖  
所以神明寶位幽贊禎符欲使逐鹿弭謀窺覲不作握

河枯地綠文赤字之書言之詳矣爰逮道至天而甘露  
下德動地而醴泉出金芝玄柜之祥朱草白鳥之瑞斯  
固不可誣也若夫衰世德爽而嘉應不息斯固天道茫  
昧難以數推亦猶明主居上而震蝕之灾不弭百靈咸  
順而懸象之應獨違今立符瑞志以補前史之闕地里  
參差事難該辨魏晉以來遷徙百計一郡分為四五一  
縣割成兩三或昨屬荆豫今隸司兗朝為零桂之士夕  
為廬九之民去來紛擾無暫止息版籍為之渾淆職方

所不能記自戎狄內侮有晉東遷中土遺氓播徙江外  
幽并冀雖充豫青徐之境幽淪寇逆自扶莫而裹足奉  
首免身於荆越者百郡千城流寓比室人佇鴻鴈之歌  
士蓄懷本之念莫不各樹邦邑思復舊井既而民單戶  
約不可獨建故魏邦而有韓邑齊縣而有趙民且省置  
交加日回月徙寄寓遷流迄無定託邦名邑號難或詳  
書大宋受命重啟邊隙淮北五州翦為寇境其或奔亡  
播遷復立郡縣斯則元嘉泰始同名異實今以班固馬

彪二志晉宋起居凡諸記註悉皆推討隨條辨析使悉  
詳該百官置省備有前說尋源討流於事為易元嘉中  
東海何承天受詔纂宋書其志十五篇以續馬彪漢志  
其證引該博者即而因之亦猶班固馬遷共為一家者  
也其有漏闕及何氏後事備加搜采隨就補綴馬淵流  
浩漫非孤學所盡足塞途遙豈短策能運雖斟酌前史  
備覩妍媸而愛嗜異情取捨殊意每含毫握簡抒軸忘  
食終不足與班左並馳董南齊饒庶為後之君子削藁

而已焉

雲南志畧序

元虞集

京師西南行萬里為雲南雲南之地方廣萬里在憲宗時世祖帥師伐而取之守者弗能定既即位於海內使省臣賽音歐德齊往撫以威惠浚其俗而導之善利填以親王貴人者四十年方是時治平方臻士大夫多材能樂事朝廷不樂外官天子閔遠人之失牧也常簡法增秩優以命吏而為吏者多微倖器名無治術無惠安遐荒

之心禽獸其人而漁食之無以宣布德澤稱旨意甚者  
啟事造釁以毒害賊殺其人其人故暴悍素不知教冤  
憤竊發勢則使然不然惡生樂死夫豈其情也哉嗟乎  
昔者簞壺迎僕之民日以老死且盡主者格於貪利虐  
師以自遠於恩化其吏士之見知者無所建白而馭於  
中者又不識察其情狀一隅之地常以為中國憂而論  
治卒未究其故不亦悲乎河間李侯景山由樞庭宣慰  
烏蠻烏蠻雲南一部也始下車未及有所施會羣蠻不



靖巡行調發餽給填撫周履雲南悉其見聞為志略四  
卷因報政上之余嘗按而讀之考其生產風氣服食之  
宜人物材力愚智勇怯山川形勢之阨塞要害而世祖  
皇帝之神威聖略槩可想見未嘗不俯伏而感歎也其  
志曰張喬斬姦猾長吏九十餘人而三十六部盡降諸  
葛孔明用其豪傑而財賦足以給軍國史萬歲貪賂隨  
服隨叛梁毘一金不取苻長感悅李知古以重賦僇尸  
張虔陀以淫虐致亂此於事至較著明白者也其術不

甚簡易乎有志之士尚有所觀覽焉至讀其記行諸詩  
必有悲其立志者矣

全蜀藝文志序

明楊慎

余嘗讀左太冲賦蜀都云江漢炳靈世載其英蔚若相  
如矚若君平王褒韡瞻而秀發揚雄含章而挺生自漢  
而下文章之盛無出於四子矣然豈徒四海考者儒游  
談為譽哉文之傳事之傳也去今千七百年而談漢事  
如昨日繫四子之文也文乎文乎其可謾乎若夫陳子

昂懸文宗之正鵠李太白曜風雅之絕麟東坡雄辨則  
孟氏之鋒距邵菴詩律比漢廷之老吏繼炳靈而躡蹤  
咸挾藻而騁轡猗歟多矣況子安少陵薄遊徧乎三巴  
石湖放翁篇詠洎於百濮其原本山川極命草木亦楚  
材晉用秦渠韓利矣先君子在館閣日嘗取素說友所  
著成都文類李光所編固陵文類及成都丙丁兩記輿  
地紀勝一書上下旁摻左右采獲欲纂為蜀文獻志而  
未果也悼手澤之如新悵往志之未紹罪謫南裔十有

八年辛丑之春值捧戎檄蹙過故都大中丞東阜劉公  
禮聘舊史氏玉壘王君舜卿方洲楊君實卿編錄全志  
而謬以藝文一局委之慎乃檢故麓探行篋叅之近志  
復採諸家擇其菁華褫其煩重拾其遺逸剪彼稂稂支  
郡列邑各以乘上又得漢太守樊敏碑於廬山漢孝廉  
柳莊敏碑於黔江文無錯訛刻猶古欽東阜公喜曰漢  
碑之傳於今中原亦掃迹矣乃今得茲於遠邦不謂斯  
舉之獲乎唐宋以下遺文墜翰駢出橫陳實繁有臚乃

博選而約載之為卷尚盈七十中間凡名宦遊士篇詠  
關於蜀者載之若蜀人之作僅一篇傳者非關於蜀亦  
得載焉用程篁墩新安文獻志例也諸家全集如杜與  
蘇盛行於世者祇載百一從呂成公文鑑例也同時年  
近諸大老之作皆不敢錄以避去取之嫌循海虞吳敏  
德文章辨體例也開局於靜居寺宋方二公祠始事以  
八月乙卯日竣事以九月甲申自角匝軫二十八日以  
畢食時而成既愧劉安之捷懸金以市又乏呂覽之精

乃屬鄉進士劉大昌周遜校正而付之梓人昔漢代文  
治興之者文翁禮殿之圖後世之建學倣焉七十子之  
名馬遷之立傳徵焉當時號為西南齊魯岷峨洙泗文  
之有闕於道若此文翁之功不可誣也繼文翁而作者  
今之阜翁歟獨愧慎華顛白紛舊植荒落不足以揚四  
子之芬而成一邦之史也恕其不敏補其未備尚有冀  
吾黨之助焉

蒼梧軍門志序

許應元

少司馬括蒼應公著軍門志成屬應元曰子為我叙其  
意應元既辭不文不可則受而卒業歎曰嗚呼意遠矣  
而何其憂之深也今天下言侵伐之患者北則一南則  
有兩粵之夷然而北之情在目睫之前而其備常在千  
里之外粵之形在萬里之外而其患乃在蕭牆之內也  
何者北人所居絕遠其欲入寇中國率行空虛之地數  
百千里然後乃抵塞下俟望誠謹則可以知其聲鄉而  
為備故曰在千里之外當路塞去畿郡遠者數百里近

乃一二日耳羽書可旦夕達也故屬者常得以天下之力而備北故曰在目睫之前也夫兩粵者絕南裔夷之交也山海谿洞之蠻與諸郡形錯壤接並耕而爭食之保固恣睢不狎詬言苟得而已不顧死亡自昔上仁之所不懷而彊武之所不警也獸集鳥散亭隧曷塞之所不得施甲盾劍矢之所不猝備也而粵之民無歲無夷寇之賊矣然而天下知北害而未覩粵憂者北近而粵遠故曰其形在萬里之外而患乃在蕭牆之內也夫粵



之夷非能為中國害也然一日不備則嶺海震蕩憲  
祖晰其然故開府建節宿重兵於蒼梧授大臣以不禦  
之柄為萬世規深遠然而碩畫之老屢建夫誅討之勲  
薦紳大夫攄鉤深致遠之慮鷹揚爪牙之士効執訊獲  
醜之力士馬甲兵之盛燁赫乎遠方技擊蹶張之用便  
習於士伍志之所云亦信矣然公顧且以為憂者何也  
嗟乎是乃公之所以為憂者也先王之致武也固曰勤  
卹民隱而除其害夫粵之用兵亟矣粵人之力屈久矣

侵盜之虞有迫而師旅之奉無緩斯坐敝之形也詩曰  
彼旃旒斯胡不旆旆憂心悄悄僕夫况瘁夫旗章之盛  
委屬之重可以為寵已而君子以為憂也憂故慮詳慮  
詳故事善事善則毗庶豫毗庶豫則武節奮此勝算也  
故公再克敵而民不知嗟夫心之疚矣瘁豈顧問哉然  
是則奚用志也傳有之曰采薇廢則征伐缺矣出車廢  
則功力缺矣杖杜廢則師衆缺矣夫司馬揖讓之法存  
而三代仁義之師猶少概見於後世牧民形勢乘馬之

篇著則攘夷之功春秋有紀焉況夫盛時之所以始憂勤而終逸樂者乎胡可廢也胡可缺也廢且缺者衆其歸至於萬物不遂而四夷交侵故先王重之然則公之急於志也者其又惡夫缺也哉嗚呼意蓋遠矣

青州府誌序

李攀龍

夫志也者志也方志是事而已欲善之以有所取義作者之志也青州為郡其事則詩書周禮春秋國語史記管晏諸書君子得以識其大者其取義則所謂有能紹

明世繼春秋本詩書禮樂之際意在斯乎與鳩氏邈矣  
先王疆理天下尚父方就國而萊人爭營丘罷侯置守  
分領并隸不常所治何以按籍如指諸掌作二十有二  
圖與沿革表爰始賜履自天子命田和請立挾濁澤之  
遇漢諸王子廢絕半之迄今親賢隱惟藩屏有司庶長  
更至迭謝與高國世卿異矣鄉舉里選明經射策之制  
興焉作封建職官選舉表榮感守虛釋寃振老龍關馬  
山之陽乃詭天是使比論行事不遠明威作星野灾祥

志海岱惟青州鎮曰沂山淄澠流惡安得決瀆洛之水  
汁肥自穢而放於瑯琊比先王觀太公報政禮從其俗  
寬緩闊達繇之平易中具五民而地重難動搖六十牧  
豕固陋性成方願罷西南夷不置滄海郡安得布被為  
而曰齊人多詐也今自見采金煮海之徒不可動搖不  
知我無以制其命乃惟其俗之罪作山川風俗志鷄鳴  
犬吠穀擊肩摩然陰雍長城暨池龍夏二分之一非穀  
所生克服其政亦既富強絲蠶於燕牧馬於魯南多山

谷登降之岷上斷輪軸下采杼粟其餘鹽締海物雜錯  
戶登則田治賦平則產息三者相成以官山海即升葵  
丘壯冠裳之會入石室探文字之原賢者亦有此樂矣  
作戶口田賦物產古蹟志著定而官君子所由以基命  
寧一而出政治之位中國授室羣萃州處以就閒燕言  
必敬義有社稷焉祝史薦信堯之五吏安用鮪脯靈山  
河伯無所為禱作官署學校祀典志昔稱節制技擊為  
之不教而戰安謂怯於衆鬪卻流賊數萬騎亦由人自

為戰議者謂顏神可城而不可規為縣蓋以官具則民  
墮而險不為用穆陵之勝是稱四塞閔以稱兵足備他  
盜桓為遊士奉之車馬國家一統承流載道察民疾苦  
使者相望疲於奔命置郵如綫作兵防城池闔梁驛傳  
志掩胷塞塗振孳懷里愴焉示睦龍夏以北至於海莊  
門山之祠奚用牢筴為哉觀孟嘗君之泣然於雍門周  
斯逼城而葬者未為失之逢於何捆心路寢五丈夫見  
夢梧丘蓋已慘於堙微發掘之患矣齊魏之季實崇佛

老有屹其棲伺我失道作鄉社陵墓寺觀志嬰之知景  
公不能用仲尼猶仲尼之知嬰不能使景公用已尼谿  
天沮不遇非人維諸侯享國從治以長大哉制辭寵靈  
篤叙九合一匡不可繼矣自餘取節槩於吏體士生其  
間卓稱達材左司馬伯公中大夫王邑富強之佐蓋姑  
置焉而況宗弟蔣弟丁惠之功作聖賢封建名臣宦績  
人物傳相勸以趨義忠臣所難有激而累親孝子之過  
自公治長受業身通田轅伏鄭代為大儒源本六經家



傳人授終始大聖之篇號為閔大主父嚴安上書言事  
感動人主穰苴孫武至今言兵法者宗焉鍾離業陽助  
王息養程本寄食海濱泯子午載書三百作忠義孝友  
儒林文學武功隱逸僑寓傳俠無義則豪輕季次故齊  
人而後之言俠者置之狐咍子狄氣足鼓衆士有私伍  
同袍之役乃過為之隱憂務摧剪其豪卒然按籍無怪  
其恫疑引避也作卓行傳治不越閭有脫珥之后亦有  
鷄鳴之夫人北宮嬰兒何為不朝大國問焉守數精明

倉公可謂近之矣。郎生望氣能亦各有所長。氣同跡異。各以其極。聖哲之變。仙釋間出。作列女。方技。仙釋傳。均之進德。勸一懲二。城陽大夫自取杜滅。梁丘柏。騫過而能。悛是從。末減。崔慶之惡失之。履霜作外傳。倉頡篇起自上世。金匱藏於王府。惜韶樂無章。不得其亂。羽翼經術。具列傳。義君子有道。懸之閭。食魚乘馬。紀有丹書。無排於亡文學。天性後之作者。彬彬乎幽以明。為形怪以常。為體精氣相挾。假合為物情。則然耳。君子存之作藝。

文遺文雜志凡一十有八卷為目四十有三備矣善是之具於人事蓋獨詳焉若曰非徒以存文獻而已屬之其人取義具在後之覽者神而明之此秦杜二公之志郡諸君子賢士大夫之相與以有成者也有能紹明世繼春秋本詩書禮樂之際意在斯乎是為序

岳王祠志序

湯顯祖

越有忠佑祠者在泉司焉祀宋武穆王岳飛也司故王宅王亡以為太學元以為司而祠王其東祠宋孝宗之

為也祠志為冊六凡王所自為文與其時至於今所以  
榮哀王者盡是梓而存之司庶拜王祠下者貌而既其  
實云王之勇於忠孝其天性然斯志也其以資世之感  
愴流涕指髮豈有間然者哉予獨怪王以大將之才為  
戰將之用而用益以不終當時無將將者然則若肅代  
之將李郭可與曰韓蘄王可以並郭而王賢於李高宗  
之資不能為肅若代亦其勢然蘄王逸而鄂王拘非鄂  
王勇而蘄王智也鄂拘蘄逸而鄂之拘不免矣

肅代雖疑其臣不得而誅之外多大藩師或以為名如  
李司徒召之不來矣終不能有加焉王之不肯為李亦  
勢然也或曰王何不竟滅敵而朝附於人臣出境遂事  
之義此不然也觀金起時其君臣父子叔侄將相之間  
皆意念深毅經略雄遠非可猝猝乘弊而竟者且其時  
諸將並以詔還王以偏師濟乎夫王以歸而死得為世  
所哀憐佻而逞王之為王未可知也王所謂進退維谷  
者歟嗟夫有高宗以其宅為宮故有孝宗附其宮為廟

王為人不可知神而後知之也雖然孝宗時而王在猶之不能用王蓋孝之不能為代亦猶高之不能為肅何也徽高在高與孝雖有志勢皆有所不得行若使徽得幸蜀高孝為親父子高總國而孝撫軍滔然無疑畫河南北之地以與諸將所克王收其全以俟此亦高孝之所欲為也勢不能也嗟乎古今相弔豈惟高之於王而已哉予志而悲之聊以告後之君子

文章辨體彙選卷三百十七

欽定四庫全書

集部

文章辨體彙選卷三百十八至  
二十

詳校官中書臣實汝翼

主事銜臣徐以坤覆勘

總校官檢討臣何思鈞

校對官中書臣葉蘭

謄錄監生臣張護

欽定四庫全書

文章辨體彙選卷三百十八

明 賀復徵 編

序三十八

譜牒類

譜例序

宋蘇洵

古者諸侯世國卿大夫世家死者有廟生者有宗以相  
次也是以百世而不相忘此非獨賢士大夫尊祖而貴  
宗蓋其昭穆存乎其廟遷毀之主存乎其太祖之室其



族人相與為服死喪嫁娶相告而不絕則其勢將自至於不忘也自秦漢以來仕者不世然其賢人君子猶能識其先人或至百世而不絕無廟無宗而祖宗不忘宗族不散其勢宜忘而獨存則由有譜之力蓋自唐哀譜牒廢絕士大夫不講而世人不載於是乎由賤而貴者恥言其先由貧而富者不錄其祖而譜遂大廢昔者洵嘗自先子之日而咨考焉由今而上得五世由五世而上得一世一世之上失其次而其本出於趙郡之蘇以

為蘇氏族譜他日歐陽公見而歎曰吾嘗為之矣出而觀之有異法焉曰是不可使獨吾二人為之將天下舉不可無也洵於是又為大宗譜法以盡譜之變而并載歐陽氏之譜以為譜例附以歐陽公題劉氏碑後之文以告當世之君子蓋將有從焉者

羅氏族譜序

元虞集

世有為譜系於其家者獨眉山蘇氏書法最具其詳略遠近親疎之殊可引而觀也後之為譜者必稽焉今豫

章羅氏族譜斷自崩以下凡十有五世分十八派合其族子弟千百人夫定其可知而不妄援於已遠詳其所至而不輕遺於已疎所謂質而不誣詳而有序者庶幾得之然予竊觀其數世之間偉然以科第自至仕官至郡守有聞人當時者相望可謂盛哉及其末也去為老佛之徒或不得其名而始次其甲乙甚者或無以為繼亦足慨然矣嗟夫盛衰之相形盈虛之迭至彼十百人之身其初一人之身也豈其一人之身而福澤所沾被

有鍾於此而遺於彼者則其理吾有所不知者矣古者天子之廟七諸侯五大夫三適士二庶人祭於寢聖人之心亦豈不欲夫士庶人者皆有以推其烝烝之孝上及其遠始曾高之祖而無所間歟其貴賤貧富尊卑之殺有不容不然者矣彼其立為大宗之法有百世不遷之義者蓋必天子諸侯之家為然他非所可及也故宗廟墳墓以系之冠昏喪祭以告之紀之以昭穆氏族養之以采地租稅又為三宥制行以致其嚴凡有宗族子

弟之賢者必薦之以為諸侯卿大夫士而其不肖者莫不資於上以自養而不必有流離淪替之憂然則雖百世可也今吾黨以布衣微蕨之約顧能紀錄其族從至於十餘世而不止豈非用心之厚者哉然於祭而無其禮也於親而無以合也抑亦姑使其後之人知其身之所自而不忍於自棄而已嗟乎其亦可以有所感也夫

范氏族譜序

明方孝孺

為子孫以奉先祀亦難矣為常人之子孫非難而為名

之士子孫能世其家者未嘗絕而孔孟之胄千載無顯人非無顯人也祖德崇高難乎其為顯也蜀之范氏在宋盛時忠文公景仁以危言高節為海內所宗而正獻公淳夫以直道正學為元祐名臣正獻之子元長復能繼先業為建炎良史官聲猷之美後先相照可謂盛矣元長七世孫煥卿值元李之亂圖牒散亡重緝所知自忠文公高祖而下至於今凡十五世為家譜以示將來煥卿之子彥良從予遊因以序為屬古之貴乎修譜者

人之子孫難也為名人之子孫固難而為大賢之子孫尤難夫嚴烝嘗守冢墓保上世之所傳以自立於閭里常人能是亦足矣而欲繼名人之門者豈止於斯而已乎行焉必端也言焉必信也學必有以過於人而才必有以用於世也求無愧於名人庶乎其可也而欲卓然立於大賢君子之後以求無忝焉則亦何足以慰天下之望哉故言乎家世之可貴則莫尚乎為賢者之子孫言乎道德之難全亦莫難乎為聖賢之後也美才篤行

之子孫亦羞稱其世而不慊其為人范氏二三公雖不獲富貴於時或遭竄斥以死然至今尊仰師慕愈久而益隆而其後人猶能嗣詩書禮樂之傳久而弗變則夫人亦何樂為小人而不思為君子之歸哉范氏子孫觀乎譜而師先祖之善戒小人之惡則為君子也可冀矣夫有君子而無祿位族雖衰猶盛也祿位光榮而君子無聞焉族雖盛猶衰也煥卿年八十餘學行惇慎鄉人稱之而彥良亦好學有志所謂無忝於賢者之子孫其



非特以著世次紀官位而誇於人也蓋將使後世觀之而考世德之淳疵明流澤之廣狹而益思所以自立云爾在忠文之時秉國柄以好惡榮辱當世士者莫如王安石呂惠卿在正獻時莫如章惇蔡京張商英林希之流此數人者方其志得氣盛視賢士大夫不啻其敵讐必欲擯廢竄殛之而後快由今觀之彼之禍心虐燄銷滅無遺而匈聲惡聞不可掩匿人至不忍言之於口而其遺屑亦未聞有存者縱或有之非惟人所惡見而為

將是在乎

刻朱子實紀序 李夢陽

朱子實紀一十二卷發源戴氏所編而刻於歙鮑雄氏  
予在白鹿洞書院感朱子出處之事會得實紀而覽惻  
愴俯仰於是泣然而悲焉按實紀朱子年二十二仕七  
十致仕中間五十年更事四朝然官不過待制在外者  
九考立朝則四十日而已白鹿洞建書院也時年五十  
矣猶知南康軍事於戲何其遇不易至此哉他不必論



孝宗者非宋之英明君哉亦不為不知公三十年間詔對垂拱殿者一延和殿者二而已豈所謂吾退而寒之者至耶世常言用舍有命亦闕運數故以文帝之明而使賈誼李廣沒於下位有武帝之好文而董仲舒不能安諸其朝夫宋之南也斯則何時而可以漢之二帝諉耶故知賢而不好是曰不知好而不用是曰不好用而不專猶不用也若孝宗者於公為用耶好耶知耶嗚呼難言哉當是時大臣知公者陳俊卿輩數人耳亦寡矣

譽者已毀者繼引者厄嫉者力黃氏狀公行曰百年論  
定必有知愚言者予讀之未嘗不泣然而悲也公既沒  
於是大人君子宗其學達官顯夫程其猷言臣文士頌  
其業門人發明其授受見者懷其儀刑聞者淑其緒理  
薄海內外咸誦其書於是謚贈議於上祠廟建於下蔭  
錄及其子孫蓋其論不俟百年而定矣何則水平則鑑  
物故賢者沮抑於生時而論每定於身後者以平也然  
於宋則何補矣人曰仲尼之不過春秋之不幸萬世之

幸如是則公之遇不遇吾又奚悲戴氏名銑字寶之為給事中卒有生曰汪愈者戴甥也以實紀視雄雄先世名元康者復朱子祠田者也文載實紀中

東魯韓氏世譜序

徐楨卿

韓氏瀘人也曰東魯者系於始也夫韓始於桓叔之後也何為魯乎桓叔遠也系韓於魯斷自其所徵始也昔先王賜姓命氏所以昭祖考係宗屬別嫌疑定親疎而人道於此繇焉故夫絕者不敢以冒續也疑者不敢以

強附也是謂慎之至也夫自帝王以降姓氏之變合本末之同異難可以勝言也然而導水者知其源辨塗者循其脈皆可易知也故上古之世民無亂族而禮有定宗故仁睦行而民不悖也季世澆喪夷夏胥亂民多流亡故世譟隳而氏族淆錯抑已甚矣故有宗人相夷若秦人視越人而不知恤者何也譜族湮而仁義之道塞也今天下晏謚百有餘年縉紳之家頗尚彛禮輯譜謀以厚人倫然往往由祖考等之槩莫之聞矣豈非喪亂

之禍哉韓自魯散燕入蜀鼎樹者七世猗其盛矣夫本盛則末繁枝披則葉散滋蔓永久則糾錯紛紜而不可緒焉此訛亂之道也故述者因宗紀究旁屬宗本以定始叙疏邇以別親親所以防其流也其聞見之未徵載記之所缺則斷而刊之慎其本也詩曰緜緜瓜瓞此言循其本也將使來者尋始之末合異反同雖服盡而澤未夷則厥初之念興角弓之怨釋此述譜之志也其餘發凡雖繁而其要有五一曰紀實以昭德也二曰粵爵

以貴功也三曰考終以崇祀也四曰象服以永思也五  
曰述親以示守也此又譜之變例也反其源叅其變而  
後子姓之道備矣或曰譜何始乎史也史以述往故革  
命而史作譜以明祖考故自我不書夫乃謂之子姓之  
道乎曰聖哲作易以明天道非為天道設也所以示乎  
人也述史以章往非以為繩往也所以戒乎今也夫使  
宗族舉滅禮教廢子姓不勤祖廟無食墳墓穢而不修  
此皆孝子仁人之所隱也故準史以述譜所以明乎人



倫也人倫序而孝弟興孝弟興則禮樂作古者明王所以崇姓氏而謹昭穆者也傳曰明乎禘嘗之義其如視諸斯乎其此之謂也

陸氏譜序

徐渭

當漢之興也尉佗以鯨鯢之資涎沫島外當其時不有陸賈之賢用數語以下之則南海之波幾於沸及宋之亡也朝廷在樓櫓間矣老嫠抱孤子而泣此與續息者何異哉而秀夫周旋其間一日尚喘則一日尚藥夫國

之存亡不可定而定於兩公者則如此余少嘗渡庾嶺  
半遊南中即未至匡山然舟轡之迹多兩公履舄之所  
經也每一思之或問遺蹤於故老至說佗及抱帝事未  
嘗不慨焉以興泣然以淚思起其人而與之語一以解  
頤一以痛哭今來訪天目過富春為陸邵武君所延醉  
而宿其廬出其譜乃知君兩公裔也環鹿山而居生者  
數十家其歿而墓者封亦以十數問其來不過二三世  
中人耳其繁如此不譜何以令不湮且疎耶予與君言

則知君文而有禮如此矣不覺是又安知其能篤於人倫又如此耶因起告之曰夫余昨遊南中追念二公之遺而感之如彼又況親見其子孫若君輩耶且余於兩公路人也猶感之如彼又況其為子孫若君輩者邪吾卜之行且見陸氏有人矣誠如是即君不屬余以譜序猶當序之況君果屬余也

龍游翁氏宗譜序

歸有光

傳曰古聖人之治天下反古復始不忘其所由生上治

祖禰下治子孫旁治昆弟合族而食序以昭穆別之以  
禮義尊尊親親長長男女有別親親故尊祖尊祖故敬  
宗敬宗故收族收族故宗廟嚴故聖王之治天下非特  
以自私也以此推之自王公以逮於庶人故宗法明而  
禮俗成權度量文章服色正朔徽號器械衣服由此而  
出三代之衰廢古亡本人自為生渙然靡所統紀而天  
下更大亂經大兵而後定當此之時人如鳥驚魚散豈  
知夫鄉里族屬之所繫哉然魏晉而降區區綜核百氏

以門第官人雖畀姓雜譜皆藏於有司而譜牒特盛迄於李唐猶相崇重五季衰亂蕩然無復有存者矣雖然古之聖王以親親也親親而宗法立宗法立而譜系自明非獨以譜也譜之盛也魏晉之失也至於譜亦不存而學士大夫莫知其所自而仁人孝子之心茫乎無所寄豈不重可歎哉翁氏居太末相傳自隋始遷子孫蔓衍縣之杜山塢岑堂庵南村往往而是其居杜陽者曰文欽能追考其十八世以上曰學士君學士而下六世

有官號妃姓墓地而不著其諱七世而下始有諱十五  
世始書兄弟又一世昭穆詳焉文欽既以為圖出以示  
予予觀之而歎世之君子莫能以為也為序而歸之

文章辨體彙選卷三百十八

欽定四庫全書

文章辨體彙選卷三百十九

明 賀復徵 編

序三十九

以下紀錄類

東方朔畫像贊序

晉夏侯湛

大夫諱朔字曼倩平原厭次人也魏建安中分厭次以  
為樂陵郡故又為郡人馬事漢武帝漢書具載其事先  
生瓌瑋博達思周變通以為濁世不可以富樂也故薄



遊以取位苟出不可以直道也故頡頏以傲世傲世不  
可以垂訓也故正諫以明節明節不可以久安也故詆  
譖以取容潔其道而穢其跡清其質而濁其文弛張而  
不為邪進退而不離羣若乃遠心曠度瞻智宏才倜儻  
博物觸類多能合變以明算幽贊以知來自三墳五典  
八索九丘陰陽圖緯之學百家衆流之論周給敏捷之  
辨支離覆逆之數經脈藥石之藝射御書計之術乃研  
精而究其理不習而盡其功經目而諷於口過耳而闇

於心夫其明濟開豁包含弘大陵轢卿相嘲哂豪傑籠  
罩靡前蹈藉貴勢出不休顯賤不憂戚戲萬乘若寮友  
視侍列如草芥雄節邁倫高氣蓋世可謂拔乎其萃遊  
方之外者已談者又以先生噓吸冲和吐故納新蟬蛻  
龍變棄俗登仙神交造化靈為星辰此又奇怪恍惚不  
可備論者也大人來守此國僕自京都言歸定省覩先  
生之縣邑想先生之高風徘徊路寢見先生之遺像道  
遙城廓觀先生之祠宇慨然有懷乃作頌焉

馬汧督誅序 潘岳

惟元康六年秋九月十五日晉故督守關中侯扶風馬君卒嗚呼哀哉初雍部之內屬羌反未弭而編戶之民又肆逆馬雖王旅致討終於殄滅而蜂蠆有毒驟失小利俾百姓流亡頻於塗炭建威喪元於好畤州伯宵遯乎大谿若夫偏師裨將之隕首覆軍者蓋以十數剖符專城紆青拖墨之司奔走失其守者相望於境秦隴之僭華更為魁既已襲汧而館其縣子以渺爾之身介乎

重圍之裏率寡弱之衆據十雉之城羣民如蝟毛而起  
四面雨射城中城中鑿穴而處負戶而汲木石將盡樵  
蘇乏竭芻蕘罄絕於是發梁棟而用之蜀以鐵鎖機關  
既縱礮而又升焉燹陳焦之麥柿栲栳之松用能薪芻  
不墮人畜取給青烟傍起樵馬長鳴匈奴醜駭而疑懼乃  
闕地而攻子命穴浚漸寘壺錙瓶甌以偵之將穿響作  
因焚櫟火薰之潛氏殲焉久之安西之救至竟免虎口  
之厄全數百萬石之積文契書於幕府聖朝疇咨進以

顯秩殊以幢蓋之制而州之有司乃以私隸數口穀十斛考訊吏兵以櫟楚之辭連之大將軍屢抗其疏曰敦固守孤城獨當羣寇以少禦衆載離寒暑臨危奮節保穀全城而雍州從事忌敦勲效極推小疵非所以褒獎元功宜解敦禁劾假授詔書遽許而子固以下獄發憤而卒也朝廷聞而傷之策書曰皇帝咨故督守關中侯馬敦忠勇果毅率屬有方固守孤城危徼獲濟寵秩未加不幸喪亡朕用悼焉今追贈牙門將軍印綬祠以少

牢魂而有靈嘉茲寵榮然潔士之間穢其庸致思乎若  
乃下吏之肆其噤害則皆妬之徒也嗟乎妬之欺善抑  
亦質首之讐也語曰或戒其子慎無為善言固可以若  
是悲夫昔乘丘之戰縣賁父御魯莊公馬驚敗績賁父  
曰他日未嘗敗績而今敗績是無勇也遂死之圍人浴  
馬有流矢在白肉公曰非其罪也乃誅之漢明帝時有  
司馬叔持者白日於都市手劍父讐視死如歸亦命史  
臣班固為之誄然則忠孝義烈之流慷慨非命而死者

綴辭之士未之或遺也天子既已策而贈之微臣託乎  
舊史之末敢闕其文哉

弔魏武帝文序

陸機

元康八年機始以臺郎出補著作遊乎祕閣而見魏武  
帝遺令愴然歎息傷懷者久之客曰夫始終者萬物之  
大歸死生者性命之區域是以臨喪殯而後悲覩陳根  
而絕哭今乃傷心百年之際興哀無情之地意者無乃  
知哀之可有而未識情之可無乎機荅之曰夫日蝕由

乎交分山崩起於朽壤亦云數而已矣然百姓怪焉者  
豈不以資高明之質而不免卑濁之累居常安之勢而  
終嬰傾離之患故乎夫以迴天倒日之力而不能振形  
骸之內濟世夷難之智而受困魏闕之下已而格乎上  
下者藏於區區之木光於四表者翳乎叢爾之土雄心  
摧於弱情壯圖終於衰志長算屈於短日遠跡賴於促  
路嗚呼豈特替史之異闕景黔黎之怪類岸乎觀其所  
以顧命冢嗣貽謀四子經國之略既遠隆家之訓亦弘



又云吾在軍中持法是也至於小忿怒大過失不當效也善乎達人之讜言矣持姬女而指季豹以示四子曰以累汝因泣下傷哉曩以天下自任今以愛子託人同乎盡者無餘而得乎亡者無存然而婉孌房閨之內綢繆家人之務則幾乎密與又曰吾婕妤妓人皆著銅雀臺於臺堂上施八尺牀張總帳朝脯上脯糒之屬月朝十五輒向帳作妓汝等時時登銅雀臺望吾西陵墓田又云餘香可分與諸夫人諸舍中無所為學作履組賣

也吾歷官所得綬皆著藏中吾餘衣裘可別為一藏不能者兄弟可共分之既而竟分焉亡者可以勿求存者可以勿違求與違不其兩傷乎悲夫愛有大而必失惡有甚而必得智惠不能去其惡威力不能全其愛故前識所不用心而聖人罕言焉若乃繫情累於物外留曲念於閨房亦賢俊之所宜廢乎於是遂憤懣而獻弔云爾

張中丞傳後序

唐韓愈

元和二年四月十三日夜愈與吳郡張籍閱家中舊書  
得李翰所為張巡傳翰以文章自名為此傳頗詳密然  
尚恨有闕者不為許遠立傳又不載雷萬春事首尾遠  
雖材若不及巡者開門納巡位本在巡上授之柄而處  
其下無所疑忌竟與巡俱守死成功名城陷而虜與巡  
死先後異耳兩家子弟材智下不能通知二父志以為  
巡死而遠就虜疑畏死而辭服於賊遠誠畏死何苦守  
尺寸之地食其所愛之肉以與賊抗而不降乎當其圍

守時外無虬蟬蟻子之援所欲忠者國與主耳而賊語以國亡主滅遠見救援不至而賊來益衆必以其言為信外無待而猶死守人相食且盡雖愚人亦能數日而知死處矣遠之不畏死亦明矣烏有城壞其徒俱死獨蒙媿恥求活雖至愚者不忍為嗚呼而謂遠之賢而為之邪說者又謂遠與巡分城而守城之陷自遠所分始以此詬遠此又與兒童之見無異人之將死其臟腑必有先受其病者引繩而絕之其絕必有處觀者見其然

從而尤之其亦不達於理矣小人之好議論不樂成人之美如是哉如巡遠之所成就如此卓卓猶不得免其  
他則又何說當二公之初守也寧能知人之卒不救棄  
城而逆遁苟此不能守雖避之他處何益及其無救而  
且窮也將其創殘餓羸之餘雖欲去必不達二公之賢  
其講之精矣守一城捍天下以千百就盡之卒戰百萬  
日滋之師蔽遮江淮沮遏其勢天下之不亡其誰之功  
也當是時棄城而圖存者不可一二數擅強兵坐而觀

者相環也不追議此而責二公以死守亦見其自比於  
逆亂設淫辭而助之攻也余嘗從事於汴徐二府屢道  
於兩府間親祭於其所謂雙廟者其老人往往說巡遠  
時事云南霽雲之乞救於賀蘭也賀蘭嫉巡遠之聲威  
功績出已上不肯出師救愛霽雲之勇且壯不聽其語  
強留之具食與樂延霽雲坐霽雲慷慨語曰雲來時睢  
陽之人不食月餘日矣雲雖欲獨食義不忍雖食且不  
下咽因拔所佩刀斷一指血淋漓以示賀蘭一座大驚

皆感激為雲泣下雲知賀蘭終無為雲出師意即馳去  
將出城抽矢射佛寺浮圖矢著其上輒半箭曰吾歸破  
賊必滅賀蘭此矢所以志也愈貞元中過泗州船上人  
猶指以相語城陷賊以刃脅降巡巡不屈即牽去將斬  
之又降霽雲雲未應巡呼雲曰南八男兒死耳不可為  
不義屈雲笑曰欲將以有為也公有言雲敢不死即不  
屈張籍曰有于嵩者少依於巡及巡起事嵩常在圍中  
籍大厯中於和州烏江縣見嵩嵩時年六十餘矣以巡

初嘗得臨渙縣尉好學無所不讀籍時尚小粗問巡遠事不能細也云巡長七尺餘鬚髯若神嘗見嵩讀漢書謂嵩曰何為久讀此嵩曰未熟也巡曰吾於書讀不過三偏終身不忘也因誦嵩所讀書盡卷不錯一字嵩驚以為巡偶熟此卷因亂抽他帙以試無不盡然嵩又取架上諸書試以問巡巡應口誦無疑嵩從巡久亦不見巡常讀書也為文章操紙筆立書未嘗起草初守睢陽時士卒僅萬人城中居人戶亦且數萬巡因一見問姓



名其後無不識者巡怒鬚髯輒張及城陷賊縛巡等數十人坐且將戮巡起旋其衆見巡起或起或泣巡曰汝勿怖死命也衆泣不能仰視巡就戮時顏色不亂陽陽如平常遠寬厚長者貌如其心與巡同年生月日後於巡呼巡為兄死時年四十九嵩貞元初死於亳宋間或傳嵩有田在亳宋間武人奪而有之嵩將詣州訟理為所殺嵩無子張籍云

序賻禮

宋司馬光

名以位顯行由學成此禮之常若夫身處草野未嘗從學志在為善不求聲利此則尤可尚也近世史氏專取高官為之傳故閭閻之善人莫之聞喪禮之廢壞久矣而民間為甚至有初喪親賓具酒食聚於其家與主人同醉飽者有以鼓樂導喪車者有因喪納婦者相習為常恬不知怪醫助教劉太居親喪獨不飲酒食肉終三年此乃今士大夫所難能也其弟永一尤孝友廉謹過於人熙寧初巫咸水入夏縣城民溺死者以百數永一

執竿立門首有他人物流入門者輒摘出之有僧寓錢數萬於室居無何僧自經死永一遽詣縣自陳請以錢歸其弟子鄉人負其債久不償者永一輒毀券以愧其心其行事類如此有周文榮者其兄嗜酒仰文榮為生兄或時酗毆文榮其鄰人不平而唁之榮怒曰吾兄未嘗毆我汝何離間我兄弟也有蘇慶文者事繼母以孝聞常語其婦曰汝事吾母小不謹必逐汝繼母少寡而無子由是安其室終身元豐中朝廷修景靈宮調天下

畫工詣京師事畢有詔選試其優者留翰林授官祿有  
臺亨者名第一以父老固辭歸養於田里此五人與余  
同縣故余得而知之悲夫天下布衣之士刻志厲行而  
人莫知者可勝數哉始太之喪其父也余兄弟賻以千  
錢且為書致之曰禮凡有喪他人助之珠玉曰含車馬  
曰賵貨財曰賻衣服曰襚今物雖薄欲人之可繼也久  
之太請刻其書於石曰鄉人不知有賻禮自太父之喪  
鄉人稍稍行之太欲廣其傳由吾鄉以及鄰縣由鄰縣

以達四方使民間皆去弊俗而入於禮豈小補哉余益美其志因諭之曰是書不足刻余竊慕君子樂道人之善請書若兄弟及周文榮蘇慶文臺亨所為以傳於世庶幾使為善者不以隱微而自懈焉

序江漢先生死生

元姚燧

其歲乙未王師徇地漢上軍法凡城邑以兵得者悉阮之德安由嘗逆戰其斬刈首馘動以十億計先公受詔凡儒服挂浮籍者皆出之得故江漢先生見公戎服而

髯不以華人士子遇之至帳中見陳琴書愕然曰回紇亦知事此耶公為之一莞與之言信奇士即出所為文若干篇以九族殫殘不欲北因與公訣斬死公止共宿實羈戒之既覺月色爛然惟寢衣留故所公遽鞍馬周號積屍間無有也行及水裔見已被髮脫屣仰天而祝盖少須臾蹈水未入也公曰果天不生君與衆已同禍矣其全之則上承千百年之祀下垂千百世之緒者將不在是身耶徒死無義可保吾而北無他也至燕名益

大著北方經學實賴鳴之遊其門者將百人多達材其  
間燧生也後不及拜其履前獲識其子卿月者七年矣  
凡再見之初以府僚見之洛陽雖嘗以好兄余猶未語  
此今以憲屬來鄧始及之且德先公不忘也燧曰嗚呼  
自先公言之夫既受詔出之軍中而使之死不以命非  
善其職且儒同出者將千數纔得如先生一人而使之  
泯沒無聞非崇其道此公所懼而必生之也自先生觀  
之孰親於其七尺之軀而大其所闢人持瓦缶將敗之

猶有惜而不果者必茹毒罹禍不可一日居故忍而為此出處非不思也中夜以興蹠膏血以鬪魑魅徑林莽以觸虎豹而始及水仰天而祝其行非不決也夫思而後行行之以決則其勢多難奪於中路使非先公自行而他人赴之能捨所忍為以回其復生之志收其已逝之魄反就是一日不可居之禍毒乎由是言之先生之死求以無辱不以全歸其生也不以有赴而以知己此其胷中揆制一時相為高下之權衡也然古之人為知



已死者有之無有為知己而生者先生以古人所不為者報之先公而先公所受先生也已多矣奚德哉卿月與余相視一泣卿月歸序所與言者贈之

文丞相傳序

許有壬

宋養士三百年得人之盛軼唐漢而過之遠矣盛時忠賢雜還人有餘力及天命已去人心已離有挺然獨出於百萬億生民之上而欲舉其已墜續其已絕使一時天下之人後乎百世之下洞知君臣大義之不可廢人

心天理之未嘗泯其有功於名教為何如哉丞相文公少年趨厲有經濟之志中為賈祖迴翔外僚其以兵入援也大事去矣其付以鈞軸也降表具矣其往而議和也冀萬一有濟爾平生定力萬變不渝父母有疾雖不可為無不用醫藥之理公之語公之心矣是以當死不死可為即為逸於淮振於海真不可為矣則惟有死爾可死矣而又不死非有他也等一死爾昔則在己今則在天一旦就義視如歸焉光明俊偉俯視一世顧膚敏

裸將之士不知為何物也推此志也雖與嵩華爭高可也宋之亡守節不屈者有之而未有有為若公者事固不可以成敗論也然則收宋三百年養士之功者公一人爾孫富為湖廣省檢校官始出遼陽儒學副提舉劉岳申所為傳將刻之梓俾有壬序之有壬早讀吟集指南錄見公自述甚明三十年前游京師故老能言公者尚多而訝其傳之未見於世也伏讀感慨惜京師故老之不及見也公之事業在天地間炳如日星自不容泯

而史之取信世之取法則有待於是焉若富也可謂能後者已

桑海遺錄序

吳立夫

頃予嘗從鄉先生學見福唐劉汝鈞貽書括蒼吳思齊論文丞相事云自江西初起崎嶇山谷購募義徒畊田洞丁造轅門請甲仗不啻數萬而尹玉寶為驍將大衣冠指麾衆皆詣闕感泣求效死已而當國二揆交沮用兵師無宣諭卒無犒賞盤桓月餘僅令守姑蘇一路張

彥提重兵居毘陵且有叛志尹玉竟以綽太湖柁橋首尾不救而溺死未幾獨松告急朝廷四詔政府六書趣棄聊攝援根本一日一夜倉皇就道及至行都而獨松隨以破陷復令駐兵餘杭守獨松朝議不一衆心離散會有尹京之命餘慶據奪其印不予漢輔遁德剛遁北軍入城與權又綽江遁乃即日拜樞使又拜右揆補與權處且令往軍前講解毅然請行及被囚以北中道奔迸收集亡散無兵無糧大勢去矣帝霸交馳正偽更作

是不一姓當世之為大臣元老者視易姓如閱傳郵況  
當滄海橫流之際而彼以異姓未深得朝廷事權欲隻  
手障之至死不屈徵箕二子有愧色於宗國矣其書大  
略如此予後又見淮陰龔開所作文宋瑞陸秀夫二傳  
蓋益詳焉方唐末五代之季藩鎮跋扈武臣驕矜君臣  
父子之義不明而土地甲兵之強類無不欲黃屋左纛  
自為者先宋知其然一旦踐大位即罷諸節度兵符遽  
用儒臣以為始終不足以盡復乎石晉所割之境土迨

乎宣和衰亂北兵南下急若建瓴曾不得乘一障設一  
候而遂至奔亡不守後宋再造東南區區山海之間內  
政不修外猶恃夫江淮以為固久之南北夾攻汴蔡之  
藩籬自撤其蔽荆襄受圍鄂渚有警巴蜀侵陷廣西之  
烽燧不絕此其國勢垂盡殆如囊中探丸圍中逐鹿無  
復有潛藏隱伏地矣所可幸者天下學士大夫二三百  
年祖宗培養作成之澤薰蒸者久忠臣義士或死節或  
死士卒之宋瑞秀夫前後死國精忠激烈誠有在於天

地而不在於古今者嗚呼吳晉陳隋之變豈復有一人  
若是哉龔開者字聖予少嘗與秀夫同居廣陵幕府及  
世已改多往來故京家益貧故人賓客候問日至立則  
沮洳坐無几席一子名浚每俯伏榻上就其背按紙作  
唐馬圖風駿霧鬣豪釭蘭筋備盡諸態一持出入輒以  
數十金易得之藉是故不窮然竟無所求於人而死志  
節既峻儀觀甚偉文章議論愈高古為此三傳類司馬  
遷班固以下不及也此亦無負於秀夫者哉予故私列



二傳以發其端詢之故老徵之雜記題曰桑海遺錄且  
以待太史氏之擇

文章辨體彙選卷三百十九